

Friehling im Flecke

Om vergangene Freidaach geeche Middaach hawwe merr unne om Moo uff de Bonk gesetze, de Schorsch, de Karl und ich, unn hawwes Gesicht in die Sunn gehalle.

Uff oomol sacht de Schorsch: Wenn merr älter werdd riecht merr nimmi so gut.

Moont de Karl: Dess stimmt, merr muss sich efter wäsche unn sichs eifers Gebiss butze.

De Schorsch guckt de Karl oo unn schittelt de Kopp. Dess habb ich nit gemoont. Ich habb gemoont, dass merr nimmi so gut rieche dut wie frieher, also dassmerr zum Beispiel bei de Blumme immer näher droo gehe muss, um ihrn Duft ze schnupperr.

De Karl hott gelacht. Ach so moonsde dess! Ja, awwer du host Recht, dess geht mir genauso.

De Schorsch hott mette Achsele gezuckt. Dess iss halt so, wenn merr älter werdd. Doo gibts aach nit vill was oom helfe kennt. Wenn merr schlechter sieht kann merr sich we-nichstens e Brill uffsetze.

Ja, sacht de Karl, unn deshalb werdd heit middach die Brill uffgesetzt unn enaus ins Feld gemacht. Iss dess nit schee, wies iwverall blieht? Alles blieht, die Quetschebeem unn die Kerschebeem unn die Äppelbeem aach. Merr muss sich nor umgucke, weil wie schnell isses vorbei mett dere Herrlichkeit.

De Schorsch hott genickt. Dess hotts Kättche mir aach gesaacht. Enaus mett derr, hott-se gesacht, doin Läpptopp konnsde aach noch im nächsde Winder kaafe.

De Karl hott mich oogeguckt unn ich habb geblinzelt, awwer gesacht hott kooner was von uns. Doo fängt de Schorsch widder oo: Merr muss awwer gar nit so weit gehe. Ich bin vorhin dorch die Unnermoostrooß gonge, von de Karthaus bis onn die Kerchschul unn dann omm Herrsch vorbei hierher. Wissder, grad dess Stick von de Unnermoostrooß mett dene japanische Zierkerschebeem – doo siehsde werklich de Friehling im Flecke, weil die Beem sinn joo iwver unn iwver voll mett rosa Bliete, ess iss e Pracht.

De Karl druff: Dess isses was ich gemoont habb, merr muss sich umgucke. Unn grad weil merr waaß dasses mett dene Bliete in e paar Daach vorbei iss, soll merr die Aaache uffmache. Merr kann de Aacheblick nit festhalle, awwer merr muss sich de Friehling oogegucke unn gut im Gedächtnis behalle, wie schnell werdds widder Winder. Awwer glaab merr, Schorsch, die Unnermoostrooß bin ich schunn ewich nimmi dorchge-loffe.

Die Schorsch weider: Iwwerhaupt die Unnermoostrooß, dess iss oo von de schönsde Strooße im alde Flecke Flerschem – unn historisch isse aach. Awwer weilse fast e Sackgass iss unn merr mettem Audo selten dorchfährt, kennt merr se kaum. Debei hätt die Unnermoostrooß e schee Geschäftsstrooß gewwe. Unne omm Moo sinn genuch Parkplätz, die Strooß iss ruhisch, ess gibt scheene Heiser dort – warum doodraus nit mehr gemacht worrn iss in de letzde Johnn, dess habb ich nie verstonne.

De Karl moont: Villeicht iss noch kooner von de Herrn druffkumme, weil die wie ich nix defoo sehe, weil merr halt nit mettem Audo dorchfährt. Honnes, saach du doch aach emol was.

Ich bin uffgestonne. Ich denk noch immer droo was der Schorsch vorhin gesaacht hott. Merr iss werklich älter worrn. Merr riecht nimmi gut, sieht nimmi gut, heert nimmi gut – awwer geht hoom wonns Zeit iss! Mahlzeit!

ebb_176_552562578_2246865229.doc

Eiern Honnes